

西  
莊  
始  
存  
稿

西莊始存稿卷三十二

題跋

跋文選補遺

右文選補遺四十卷元陳仁子撰仁子字同甫茶陵人廬陵趙文儀可序稱同甫少閱文選即恨其紕漏以爲存封禪書何如存天人三策存劇秦美新何如存更生封事存魏公九錫文何如存蕃固諸賢論列出師表不當刪去後表九歌不當止存少司命山鬼九章不當止存涉江漢詔令載武帝不載高文史論贊取班范不取司馬遷淵明詩家

冠冕十不存一二又以爲詔令入主播告之典章  
奏疏入臣經濟之方略不當以奏疏先詔令此論  
頗確其受業甥零陵郡學錄譚紹烈跋稱已刊者  
此書外尚有牧萊脞語三十卷今不傳此書與玉  
臺新詠及章樵古文苑並足羽翼昭明綴文之家  
所宜兼覽也。

跋李義山集

史稱義山放利偷合詭薄無行蓋因義山始受知  
于令狐楚楚與牛僧孺李宗閔楊嗣復朋比排李  
衛公王茂元與衛公善愛義山才以女妻之僧孺

邪黨共嗤義山爲忘恩作史者遂摭入之然衛公功名之士相業頗有可觀太牢令狐鼠肝蟲臂義山不肯阿附正見持正未可遽非其後又爲鄭亞判官亞坐衛公黨貶循州義山相從嶺外至三年之久其篤行如此猶得目以偷合無行耶

又

井泥西郊諸作筆力雄肆與他詩不類蓋義山之才能爲李杜而耻于蹈襲前人故又自變一家者也絕句云沈宋裁辭矜變律王楊落筆得良朋當時自謂宗師妙今日惟觀對屬能李杜操持事略

齊三才萬象各端倪集仙殿與金鑾殿可是蒼蠅  
惑曙雞王楊沈宋儷青妃白之技一筆抹倒眼明  
手辣特舉李杜極力推尊知其宗法有在矣楊億  
輩強作解事與飛卿柯古並稱不亦誣乎

### 詩式跋

詩式五卷釋皎然撰見新舊書志志稱皎然姓謝  
靈運十世孫晁氏讀書志陸氏研北雜志亦云與  
智永爲右軍後懷素爲錢起從子正相類今觀此  
書以康樂公爲詩中日月且言文章公器豈敢有  
私知爲靈運裔也漢人有無名氏古詩不下數十

首文選取其十九而後人多臆揣某篇出某人皆未足信玉臺新詠以其八首爲枚乘作然八首陸機擬古十二首皆有之並摘取首句爲題與今日良宴會青青陵上柏明月皎夜光諸篇古今同以爲無名者並列而無別宋南平王鑠代古四首其三皆王臺所云枚乘者而亦與孟冬寒氣至並列則文選之概以無名信也又鍾仲偉詩品謂古詩源出國風陸機所擬十二首驚心動魄幾乎一字千金其外去者日以疎諸篇頗爲總雜疑是建安中曹王所製繹鍾之意亦以機擬者爲無名可知

玉臺似未足據矣李善云古詩或云枚乘詩云遊  
戲宛與洛則辭兼東都非盡是乘明矣觀此又似  
當時以十九首並爲乘作者劉勰又以孤竹一篇  
爲傳毅作至皎然又以青青河畔草爲蔡邕作則  
更謬矣蓋古辭飲馬長城窟行玉臺以爲邕作其  
首句偶與此同故致誤耳

跋葉水心集

獨孤及至之毗陵集有正議大夫右散騎常侍贈  
禮部尚書李公墓志銘至之作志尚書右丞長樂  
賈至幼鄰作銘蘇許公瓌墓碑盧藏用作序張說

作銘華嶽廟述聖頌達奚珣作序呂向作頌皆一文而兩人共爲之水心作陳同甫王道甫墓志銘兩人共一銘真希元跋永嘉葉公著作正字二劉公志銘二劉亦同一銘者此文章之變例王止仲所未及舉也

陸君實輓詩跋

右鈔本陸君實輓詩一卷龔開聖與輯詩凡二十九首作者一十三人聖與首倡外爲方萬里回鄭疇叔範龍觀復仁夫湯子文炳龍盛中文彪尹聖子應許俞宗大德鄰宇文子敬叔簡郭元德景星



仇仁近遠侯正卿克中方韶卿鳳萬里仁近有集  
觀復有易傳韶卿詩見謝臯羽天地間集及金華  
遊錄中其餘諸公今人能舉其名者鮮矣

樸村集書後

張先生諱雲章字漢瞻以例監生數應京兆試不  
見錄用薦纂修尚書傳說彙纂書成議敘不赴卒  
于家少與先大父卓人先生同受學于陸菊隱徵  
士集中有王卓人家藝蘭一種特異花心皆淡碧  
色爲賦詩云云蓋先大父僑居黃歇渡先生過訪  
而作先母張淑人爲先生從妹惜予生晚不及承

其議論嗣君揆方字同夫窮老不遇先生遺書恐  
將散軼而菊隱後尤衰落所撰著尠有存者我邑  
在勝國時崇尚樸學不染王李俗氛蓋自宋末以  
迄明初天下文章在浙東自明嘉隆間以及本  
朝天下文章在嘉定太原閻百詩與劉超宗手簡  
願與同志感奮興起紹明古學直追金華嘉定諸  
先生之遺風其爲閎雅君子所重如此近日老成  
凋喪後生小子視鄉先正之緒言棄若芻狗而俗  
氣浸淫薰入骨髓不可復拔展讀此集爲之三歎

跋趙氏嘉定志

嘉定志向有都穆龔宏楊旦韓浚諸家此爲餘杭  
趙昕續修雖嫌蕪蔓文獻略備然如袁山松爲吳  
郡太守孫恩作亂山松守扈瀆城被害事見晉書  
袁瓌孫恩二傳元僧如蘭明上海顧彧詩誤作袁  
崧趙氏因之高郵張天永長年避地嘉定有雪蓬  
行稿江陰張端希尹有溝南漫存稿趙氏以溝南  
亦天永著並誤集仙宮現存宋碑一元碑三護國  
寺圓通寺現存元碑各一趙氏遺闕馬愈以欽天  
監天文生中天順癸未會試甲申始廷試以癸未  
試日塲屋火改八月會試故今志作甲申高佑鉅

薊上雜鈔作癸未皆是也

又

嘉定本唐崑山縣東境之膠城鄉宋時嘗掘得唐  
膠城鄉莊府君墓銘見縣志今石已不存矣說文  
云膠燒種也引漢律膠田苾草廣韻膠在十八尤  
力求切田不耕而火種也漢丹水丞陳宣碑有膠  
民胡訪膠民即耕民耳吳君高越紐錄云吳北野  
禹櫟東所舍大膠者吳王田也去縣八十里吳北  
野胥主膠者吳王女胥主田也去縣八十里而楊  
億送許洞歸吳中詩云洞庭霜橘膠田粟吳之有

膠田其來久矣但越紐所云二處膠田皆吳之北野而我邑在吳東未可即以爲吾邑膠城也

### 跋續齊諧記

梁吳均續齊諧記一卷元吳郡陸友跋云齊諧志怪蓋莊生寓言今均所續特取義云耳前無其書也此說蓋本文獻通考案廣韻云宋有員外郎東陽無疑撰齊諧記七卷亦見新唐書藝文志均續東陽氏之書馬端臨及陸氏說非也

### 跋說鈴

鈍翁說鈴琅邪王士禛子底爲序侯官林佶手錄

近奉天鮑鈐知長興縣事刻于縣齋鈐亦工詩刻  
有道腴堂集三十卷此書所記皆一時逸人勝流  
遺落聲利高自標置之語閭潛止見而詬曰羣兒  
自相貴耳然鈍翁出處雅著恬退聲康熙己未以  
宏詞被薦時崑山葉子吉侍郎寓書大冶余佮廬  
相國國柱以鈍翁賦性簡逸素耽巖棲此番恐不  
復有出山之志宜爲敦促庶幾惠然肯來余荅書  
云不須勸駕已倣裝矣翁終身病之文集無一言  
及詞館時事蓋其矜尚如此

廣德山行題名

廣德州在春秋爲桐汭左氏傳楚子西子期伐吳  
至桐汭卽此汭乃水曲桐水名也岳珂九月八日  
桐川道中云隨分秋光關節物桐川道上看黃花  
是已定公二年桐叛楚杜解桐小國廬江舒縣西  
南有桐鄉此則在江北或以爲卽桐汭非也其地  
東至長興西南界宣歙北至江衆山環之中央獨  
平衍山水頗秀異丁卯十月杪泊四安鎮登岸山  
行七十里抵州署謁房師長清曾先生尙增留信  
宿歸仍取故道憇九里岡下時宿雨新霽嵐嶂如  
畫惜地僻四方賓客所不至故稱述者少覽近時

李國相州志甄綜疎略文筆卑冗可咤也聊書于壁以諗後遊者

謁泰伯廟書事

庚午秋同王昶琴德曹仁虎來殷謁吳泰伯廟廡下有石刻迎享送神辭三章宋秘書丞龔頤正撰淳祐壬子仲秋重刊承議郎新添差太平州軍州兼管內勸農營田事賜緋魚袋陳信伯書其辭載范致能吳郡志有云蘭栢兮枿桂句法本之楚辭吉日兮辰良昌黎春與猿吟兮秋鶴與飛也頤正本名敦頤避光宗諱改和州人曾祖原爲泰陵實



錄院官故家多藏書撰元祐黨籍列傳譜述及特  
命錄符祐本末見宋史志

記打戱

江船遇下水能逆風使帆蓋帆力借風勢由南岸  
抵北復由北岸抵南往返不覺而日行百餘里舟  
人謂之打戱盛宏之荊州記云宮亭湖神能使湖  
中分風而帆南北蓋自古有此夫舟人逐利鬥捷  
似無足怪然毋乃近于行險徼幸者與君子循理  
奉天風順則帆風逆則靜守而已矣

赤壁紀遊

辛未九月七日泊黃州城下遙望峭壁背城而瞰  
江崖石皆赤色與楓林相映戴綸長曰此非赤壁  
耶遂循黃泥坂振衣而登其上有二賦堂于清端  
公成龍題扁又有張公鵬翮暨知府事汜水禹殿  
鰲通判河東賈鉉諸刻延眺移時各賦一詩以八  
分題于石上者王鳴盛也

書黃鶴樓壁

乾隆十七年二月八日同綸長宿武昌城外觀音  
閣閣在黃鵠磯下磯上即黃鶴樓明日相與登樓  
展眺碧窓朱栱縹緲半空凭檻披襟瞰臨無地萬

里江山在指顧間矣亭午陰雨歸寓雨益大挑燈  
愁坐僧人供脫粟飯夜聞樓上風動金銀鐺聲與  
雨聲相間竟夕不能寐晨起有表弟周南棧如自  
湘鄉來訪予逆旅悲喜相兼復同至樓上茶話感  
華年之徂謝悼旅迹之羈孤汚然有懷遂書于壁

天門山題壁

壬申二月廿六日泊舟西梁山薄暮陰雨予興發  
冒雨登之此山一名博望山與對岸東梁山對峙  
故又名天門太白詩天門中斷楚江開是已亂石  
崢嶸坡陀犖确攝衣至絕頂約數百丈陡峭直插

大江中形勝之壯煙雨之奇春物之秀水田之美  
皆可攬也有小菴甚庫狹亦無題榜同綸長小憇  
聊書于壁以記歲月

馬鞍山錄

癸酉夏六月望微雨登馬鞍山山得名以形似俗  
亦稱崑山紫崑山本在華亭陸士衡所謂彷彿谷  
水陽婉孌崑山陰是已梁大同元年析婁縣置崑  
山縣建治山北唐天寶十載吳郡太守趙居貞奏  
割嘉興海鹽及崑山南境爲華亭移崑山治馬鞍  
山陽于是遂以馬鞍爲崑山而華亭之山反稱小

崑山唐宋時山下皆湖建炎間宣撫周望失印于  
羣豕峰南築防屏水遂爲田見夷堅志凌萬頃邊  
實志云在縣西北三里今去縣僅一里蓋縣治移  
耳東妙高峰西一線天北鳳凰石南文筆峰皆絕  
勝處周涇林太僕更文筆峰名紫雲巖謂爲一山  
之最舊有慧聚寺寺有張愛兒塑毗沙門天王像  
蓋嶼山圖孟郊張祐王安石詩石刻淳熙間寺燬  
于火元宋毀過崑山州城西小寺院浣溪紗詞賦  
景蕭寂蓋舊觀猶未復也煙明稍事修葺又補刻  
三公詩嵌準提閣壁比予至則寺又頽落草木皆

童舊蹟皆無存惟一石鑱明正德間巡視江南水利工部郎中上虞朱袞詩而已山東南麓爲劉改之墓改之事迹略見呂大中楊維禎墓表暨詞苑叢談諸書其詩刊入陳思臨安府棚北大街書籍鋪六十家小集晚客崑山令潘友文幕卒葬于此就東齋僧舍立祠元合肥潘純子素有詩紀之明初呂誠敬之亦有陪館士秦文仲陸良貴奉省臣諭祭龍洲先生墓詩時祀猶不廢今則荒圯敗瓦一坏僅存矣憶昔雍正壬子予年十一登此山賦詩云西來山脉盡東去海天高茲來忽廿餘年矣

周覽之餘憇僧舍繙王侍御峻所輯縣志舊聞頗多放失聊爲掇拾書之壁間以待續志者

西莊始存稿卷三十二

西莊始存稿卷三十三

題跋

跋房彥謙碑

碑云彥謙高祖法壽魏東冀州刺史諸史俱作冀州謚曰簡侯魏書及北史俱作敬侯又北史法壽傳賜爵壯武侯子伯祖襲例降爲伯碑雖不言其有例降事而其云祖翼襲爵壯武伯卻與傳合若隋書本傳云曾祖伯祖祖翼並襲爵壯武侯則誤矣

跋珍州榮德縣丞梁師亮墓志銘



珍州之名考舊史地理志貞觀中開山洞置溱州及榮懿扶歡二縣屬焉置珍州及夜郎麗臯樂源三縣屬焉夜郎有隆珍山因名新史則無珍州但于溱州夜郎下注元和二年廢珍州蓋珍廢故改屬溱也舊史猶並列二州不及新史之確而皆無所謂榮德縣者蓋珍乃溱之誤榮德榮懿之誤也又稱師亮起家左春坊別教醫生考百官志左春坊藥藏局有郎丞侍醫典藥藥童無云別教醫生者師亮微冗所得官職殆皆附託虛僞非真授者故其誤如此觀其字曰永徽并本朝年號亦不知

避其妄可見矣

跋易州鐵像頌

盧暉字子晃自尚書郎出爲易州刺史造鐵佛像  
校書郎王端序其事蘇靈芝書其末并述增置三  
縣舊書載開元二十三年刺史盧暉奏分易縣置  
五迴縣于五迴山下又置樓亭板城二縣新書略  
同並與碑合又云盧君遷于瀛田君至自靈蓋代  
暉者田仁琬其德政碑予亦有之亦靈芝書新書  
又言瀛州有長豐渠開元二十五年刺史盧暉自  
東城平舒引滹沱東入淇通漕溉田五百餘頃是

暉在瀛政又足紀也此碑開元廿七年立暉去易久矣

跋楊珣碑

唐楊珣碑元宗御製并八分書太子亨奉敕題額案其文珣字仲珣右相國忠之父卒于開元五載二十七載葬于岐陽天寶十二載重贈武部尚書追封鄭國公碑當立于是年舊唐書天寶十一載正月改吏部爲文部兵部爲武部刑部爲憲部通鑑正月作三月唐六典不載此事新唐書則漏去武部之文又以憲部爲司憲亦誤也以予所見唐

碑之稱文部武部者內侍孫府君墓志銘行文部  
常選申堂構撰多寶塔銘武部判官徐浩題額是  
已考胡三省引鄭審天寶故事謂國忠本張易之  
之子史及通鑑皆云國忠爲易之之甥今此碑云  
珣夫人中山張氏與史合其云叔虞剪圭自周封  
晉伯喬食菜受邑君揚紫漢揚雄傳其先出自有  
周伯喬者以支庶初食采于晉之揚因氏焉則伯  
喬乃雄之祖其字從手不從木自雄而外別無揚  
氏今敘珣先世而述揚氏之先妄矣又貴妃傳謂  
是元琰之女國忠傳謂是妃之從祖兄參以宰相

世系表國忠之高祖汪曾祖令本令本三子曰昊陵令友諒曰志謙曰志詮昊陵者武后爲其父墓所立名也友諒乃珣之父而國忠之祖志謙則元琰之父而妃之祖也是妃爲國忠之再從妹今此碑乃以志謙爲珣父蓋國忠當日倚恃戚畹以作威福引而近之冒稱與妃同祖元宗蔽惑爲其父製碑遂據其所稱者書之耳又表于汪書隋梁郡通守而碑云國子祭酒吏部尚書表于志謙不書官而碑云青城令恐碑辭皆不足信也

跋王審知碑

唐威武軍節度福建管内觀察處置三司發運等  
使特進檢校太保同中書門下平章事使持節都  
督福州諸軍事兼福州刺史上柱國瑯琊郡王王  
審知德政碑銘銀青光祿大夫行尚書禮部侍郎  
上柱國于兢撰審知有廟在福州城中土人猶呼  
瑯琊王廟碑在廟中高二丈餘文字完好向來諸  
家從未著錄予入閩出諸草礫中命工搨得裝爲  
二冊案新史審知與兄潮俱起羣盜攻泉州殺刺  
史廖彥若潮遂有其地而碑云兄潮譽藹鄉曲福  
建節度使陳巖遣人禮請署爲泉州牧史云陳巖

卒其婿范暉自稱留後潮遣審知攻福州斬暉而  
碑云巖病不能視事軍士等懼無統御皆願有所  
依從潮遂以泉州委仲弟審邽而與審知偕赴詔  
授潮節度使此皆當以史爲正碑蓋曲筆諱之不  
可信五代史乾寧四年潮卒審知代立通鑑潮以  
乾寧四年之十二月卒而碑作三年此恐當以碑  
爲正又五代史梁太祖加拜審知中書令而五代  
舊史云以唐莊宗同光二年加中書令二說不同  
未知孰是立此碑時則審知猶未爲中書令也碑  
云曾祖友名贈光祿卿王父玉贈秘書少監父恁

贈光州刺史又贈太尉史皆略之又審知由平章  
事檢校右僕射改光祿大夫檢校司空轉特進檢  
校司徒檢校太保乃封瑯琊王食邑四千戶食實  
封一百戶史亦多削去但云封琅瑯王而已又云  
佛齊國雖同臨照靡襲冠裳公示以中孚致其內  
附即史所謂招來海中蠻夷商賈是也孫光憲北  
夢瑣言云王審知患海畔石碇爲舟楫之梗夜夢  
吳安王伍子胥許以開導乃命判官劉山甫躬往  
祈祭三奠纔畢風雷勃興山甫憑高見海中有黃  
物可長千百丈奮躍攻擊凡三日晴霽見石港通



日昇文不系 卷三十三 五  
暢便于泛涉於時錄奏賜名甘棠港此事碑亦載  
之與史本傳所述並合而孫氏尤詳又此碑立于  
天祐三年丙寅歲閏十二月而舊史哀帝紀天祐  
三年閏十二月己酉朔福建百姓僧道詣闕請爲  
節度使王審知立德政碑從之碑又言節度都押  
衙程贇列狀上請刊勒考五代史後有朱文進作  
亂據福州以程贇守漳州爲州人所殺即此人也  
其文中稱爲公而標題乃直斥之曰王審知尊朝  
命也此亦他碑所無者備書之以證好古之士云

跋東坡黃州謝上表

洪容齋得東坡墨迹十一種刻寘姑熟官廨後有容齋跋此其一也東坡在黃自念平生舉止多不合于道故其自誠有曰道不足以御氣性不足以勝習子由誌墓云轍少與公爲文相上下旣而居黃杜門馳騁翰墨其文一變如川之方至而轍瞠然不能及時東坡年四十五六蓋更歷憂患而學識漸進矣彼李定舒亶何正言輩乃東坡之藥石也厥後貢舉失李廌廌意望薦達而語之曰出處之間不能慎靜則于定命無分毫之益而于德行有止山之損論者謂公于熙寧不附和安石易于

元祐不苟同司馬公難惟不隨司馬爲不失已故  
不薦李廌爲不負友可謂知公之心者也夫其于  
定命之際卓然有見如此斯其所以能歷顛沛困  
踣而不易其守者與

又

此帖乃當時所屬草藁僅點竄數字耳想見以排  
偶爲單行奮筆疾書之概惟其取之肺腑不假雕  
飾也以集本校之亦無大異同而筆法于俊邁中  
有收斂約結之意尤爲可愛雖摹拓不精神明故  
在也中有云天地能覆載之而不能容之於度外

父母能生育之而不能出之於死中頌述君恩字  
字沉摯當公下獄太皇太后語帝曰憶仁宗以制  
科得軾兄弟喜曰吾爲子孫得兩宰相今聞軾下  
獄得非俗人中傷之耳神宗感動遂從謫成厥後  
元祐柄用夜對便殿宣仁后猶語公以用卿皆先  
帝意也帝每誦卿文章必曰奇才奇才公不覺泣  
失聲與此表中所云可以參觀矣嗟乎以公之遭  
遇受知累朝如此而流離困辱曾不得安其身于  
朝廷者蓋妨賢害能之小人其力足以制君子之  
命雖明主亦無如之何可勝慨哉

記慶壽寺碑

元慶壽寺西堂海雲禪師碑燕京編修所次二官  
黃華後人熊岳王萬慶撰文稱禪師名印簡曾爲  
金衛紹王知遇我大蒙古國聖祖成吉思皇帝太  
宗合罕皇帝暨今蒙哥皇帝累降詔旨興宗崇教  
並尊禮海雲命爲天下僧衆之首萬慶承護必烈  
大王之命爲作道行碑按蒙哥憲宗御名此碑立  
于憲宗時故但稱蒙古且無年月其時未有國號  
及紀年也考元史本紀太祖諱鐵木真即位于幹  
難河羣臣上尊號曰成吉思皇帝二十二年崩至

大二年追謚法天啟運聖武皇帝廟號太祖太宗  
諱窩濶台即位于庫鐵烏阿刺里十三年崩追謚  
英文皇帝廟號太宗據碑則太祖于憲宗時已加  
廟號曰聖祖而太宗即位時羣臣曾上尊號曰合  
罕皇帝本紀皆失載惟劉秉忠傳載其侍世祖潛  
邸時上書稱合罕皇帝聖旨此號僅見于此傳而  
世不知爲太宗宜據此碑以補本紀護必烈即忽  
必烈世祖御名史稱憲宗即位同母弟惟世祖長  
且賢憲宗盡屬以漠南漢地軍國庶事此海雲立  
碑必請命于皇弟也秉忠之侍世祖實由海雲薦

之事亦見秉忠傳題曰燕京編修所次二官者太宗八年耶律楚材請立編修所于燕京經籍所于平陽編集經史召儒士梁陟充長官以王萬慶趙著副之王圻續通考載此遺漏燕京一語疎矣其曰黃華後人者王庭筠號黃華萬慶殆其裔耳予嘗見至元辛卯交城縣萬卦山天寧禪寺碑陰有燕京慶壽寺住持僧印一名又虞氏集稱延祐甲寅息齋爲太常博士寓慶壽寺息齋爲李衍之號而陳孚遊慶壽寺詩有金碧樓臺護紫霞之句其鉅麗殆可想見今在西長安街俗呼雙塔寺僅存

數椽餘悉入民居乾隆庚辰春余罷官無事開坊  
冷巷恣意搜討因訪得此碑下半截陷土中余欲  
發土讀之而居人堅不許乃止竟未能得其全文  
不禁爲之悵悵也

又

余觀慶壽寺碑考論元帝尊號以補史家闕略旣  
又伏讀我

皇考世宗憲皇帝實錄雍正九年十一月丙寅

上諭曰四十九旗札薩克成吉思汗之後博爾濟

錦氏台吉等誠心歸順我



太宗皇祖賜以親王郡王貝勒貝子等爵是元太祖之尊號至我朝猶稱之于以歎有元之遺澤孔長而其子孫復得備屏藩盟帶礪我朝之興滅繼絕恩數至渥也嗚呼盛哉

記護國寺碑

大隆善護國寺在皇城西北元時有南北兩崇國寺此即北崇國寺也明宣德間改命名中有元碑四通其一通爲崇國寺佛性圓融崇教大師演公碑銘集賢侍講學士中奉大夫趙孟頫撰并書篆額皇慶元年三月立碑稱大師名定演燕三河人

以至大二年往持崇國寺云云其一通爲崇國寺  
重新修建碑嗣臨濟宗英悟正印宗慧禪師前大  
都竹林寺住山沙門雪澗法禎撰奉訓大夫中書  
刑部侍郎葛裡書儒林郎江南諸道行御史臺監  
察御史許居直篆額至正十一年四月立碑稱京  
師崇國寺前至元乙酉世祖皇帝所賜還傳戒大  
德沙門定演所開勅賜薊州遵化縣般若院爲  
副剎皇慶延祐間仁宗皇帝剽抄室利皇后賜鈔  
三千餘錠壽元皇太后復賜鈔五百錠至正乙酉  
僧智學號孤峰來主方丈復修之考元史列傳壽

元皇太后者順宗之妃武宗及仁宗之母自武宗至大三年已上尊號曰儀天興聖慈仁昭懿壽元皇太后至仁宗延祐二年加上尊號曰儀天興聖慈仁昭懿壽元全德泰寧福慶皇太后是也若后妃表所載仁宗皇后則但有阿納失舍里皇后荅里麻失里皇后荅里麻失里皇后已無傳至刺穆室利皇后則并其名無之蓋史家遺失宜據此碑以補其闕碑又有云今大明至尊爲世界主時順帝在位稱爲大明至尊者元大內有大明殿諸帝即位及御殿受朝賀皆在此故有此號也其一通

爲聖旨碑無書篆人姓名至正十四年七月立碑  
稱成吉思皇帝窩闊台皇帝薛禪皇帝完澤篤皇  
帝曲律皇帝普顏篤皇帝格堅皇帝忽都篤皇帝  
亦憐真班皇帝聖旨大都南北兩崇國寺天壽寺  
香河隆安寺三河延福寺順州龍雲寺遵化般若  
寺各寺房舍使臣不得安下亦不得責其鋪馬祇  
應諸寺稅糧勿納園林碾磨典鋪浴堂人口頭足  
他人勿倚氣力奪要云云案元諸帝生時用國語  
上尊號者太祖曰成吉思沒後所上者世祖曰薛  
禪成宗曰完澤篤武宗曰曲律仁宗曰普顏篤英

宗曰格堅明宗曰忽都篤俱見于史窩濶台則太宗御名亦憐真班則寧宗御名元史或作懿璘質班或作懿璘只班蓋無號者即稱名猶泰定帝本紀載其即位詔稱英宗爲碩德八剌皇帝即英宗御名也余前于慶壽寺碑辨太宗曾號合罕皇帝而此復稱名者蓋太宗之號至正時已不見于紀載宜乎修史者之不能詳也其一通爲崇國寺壇主空明圓證法師隆安選公特賜澄慧國師傳戒碑資政大夫中書參知政事同知經筵事提調四方獻言詳定使司事危素撰并書集賢大學士光

祿大夫滕國公張璘篆額至正二十四年九月立  
近日刻危學士集爲臨川李學士紱家藏本亦不  
載此文予每入寺輒徘徊四碑之下摩挲觀覽摘  
取其有益于史者詳書之如右以待後之君子得  
以考焉

僞刻郭有道碑跋

盤厓趙子函稱其邑人王正已爲介休令重刻郭  
有道碑此本未知即正已所刻否字畫醜而謬不  
必論即其題云陳留蔡邕伯喈書撰大漢建寧三  
年庚戌春三月旣望勒石不曉事如此而欲托之

漢代名公之筆多見其不知量也

西莊始存稿卷三十三

西莊始存稿卷三十四

制草

乾隆二十四年六月十一日大雩祝文

臣欽承時切參贊未能當霖雨之久虛靡焦勞之  
靡已三農孔迫敢忘夙夜省躬一念可回猶冀精  
誠上格用申祇祓特奉明禋伏思天實好生民惟  
邦本乃南北郊步親禱祝未聞霑足興歌即土穀  
神載舉馨香尚覺亢暘示警念此烝黎懸望已夏  
至之過期從今甘澍急施或秋成之可待須臾難  
緩呼籲何辭爰惕厲以致齋撤懸減膳更肅恭以



將祀蠲吉明染庶幾上帝降康之心鑒茲爲民請  
命之意殷憂自責惟思過以加虔陟降非遙幸蒙  
矜而賜澤敬攄忱悃莫罄翹瞻仰企蒼穹尚希軫  
憫謹告

兵部尚書內大臣世襲忠勤伯參贊軍務  
鄂容安謚剛烈碑文

朕惟致身授命原臣子之常經褒節勸忠實朝廷  
之彛憲志克堅於金石績用炳於旂常宜詔司勲  
式隆懋賞爾兵部尚書內大臣世襲忠勤伯參贊  
軍務鄂容安世居禁衛夙抱才猷敷偉略於樞衡

津彰篤悲播嘉謨於戟府爰著旬宣適當異域之  
歸誠尤冀得人而奠定遂以副帥之任寄爾專閫  
之司爾能叱御逆征棄繻就道金戈所指向月窟  
以揚旗玉節遙臨倚天山而築壘龍韜三略協贊  
戎行虎帳千屯鎮綏遐服乃釜魚無路遂鼓煽以  
乘機而霜柏有心歷艱危而見節捐軀不貳足寒  
小醜之心就義如歸倍壯大軍之氣稽飾終之舊  
典洵剛烈之攸宜特崇贈卹之文載沛恩綸之美  
嗚呼勒鴻名於琬琰榮貴幽泉表忠悃於丹青光  
昭史乘尚承休命永示後昆

原任漕運總督瑚寶謚恭恪碑文

朕惟宣力服勞允資篤棐之佐酬庸錄舊爰頒綸  
綍之榮績旣懋于忠勤恩宜隆于琬琰爾原任漕  
運總督瑚寶樸誠素裕敷歷有年陞楯趨班夙備  
期門之選干城簡任出膺專閫之司由山右而泣  
秦中並著功於訓練駐臯蘭而移湘漢復奏效于  
旬宣乃以穗秸之輸將特重江淮之轉運俾膺旌  
節實藉簡稽嘉清操之可風知持籌之勿爽何期  
奄化彌切愴懷考成憲而易名稱恭恪而無忝鳴  
呼指星輅于千里尚思掌庾之勲表豐碣于九原

用賁飾終之典庶承寵命永示後昆

夏禹王陵祭文

維乾隆二十二年歲次丁丑某月某日朔越幾日  
皇帝致祭於夏禹王之靈曰維王德擅聖神功昭  
奠定惟精惟一心傳獨接於見知克儉克勤盛烈  
聿彰於熙載奏刊木隨山之績乃注海而導河布  
任土作貢之猷遂東漸而西被九川旣滌垂四載  
之奇勲三壤咸均建百王之大法遐溯錫圭之躅  
長留窆石之封朕稽古制以省方繩

祖武而時邁重經臨於吳越益緬想於典謨闕殿

依然映空庭之橘柚橋山在望連遠陌之菁茅爰躬蒞於几筵用親陳夫籩豆靈其昭鑒享此明禋

明太祖陵祭文

維乾隆二十二年歲次丁丑某月某朔越幾日  
皇帝致祭於明太祖之靈曰維帝英姿首出雄略  
如神起濠泗而乘時丕建安民之業奠寰瀛而垂  
統聿彰戡亂之謨治定功成修人紀而澄吏治禮  
明樂備崇正學而禮耆儒仰茂績之流傳已長昭  
於史乘問故都之弓劍猶未改於園陵朕載蒞南  
邦式遵

祖訓親臨鍾阜躬奠樽醪祠宇如新緬勝國開基  
之烈松楸勿翦見我朝

列聖之仁秩祀旣將溯懷彌切靈其來格尚克歆  
承

浙海神祭文

維乾隆二十二年歲次丁丑某月某朔越幾日  
皇帝遣某官致祭於浙海之神曰惟神惠安南紀  
奠定東瀛德著朝宗翕受用承乎百谷功歸潤下  
灌輸兼利乎三農嘉清晏之蒙休滄波久靖念閭  
閻之托庇報饗宜虔朕法古觀風載臨浙水覩此

安瀾之有慶益徵神貺之靡涯于豆于登稽舊儀而勿替以妥以侑當時邁而彌殷尚冀居歆永綏兆庶

南鎮祭文

維乾隆二十二年歲次丁丑某月某朔越幾日

皇帝遣某官致祭於南鎮會稽山之神曰惟神德凝艮止位宅離明毓秀鍾奇應星文於斗野出雲降雨表鉅鎮於揚州生靈咸被其休祥井邑爰徵康阜秩祀宜嚴於殷薦几筵肇舉馨香朕清蹕錢江再行春省念茲名山之障衛特重東南聿申盛

典之輝煌肅將蘋藻神其昭鑒祐我烝黎

宋臣錢鏐祭文

維乾隆二十二年歲次丁丑某月某朔越幾日

皇帝遣某官諭祭於宋臣錢鏐之靈曰惟爾祥鍾  
天目秀毓臨安當運會之艱虞爰舉兵於浙右爲  
生民之扞衛乃開府於鎮東智勇克兼遂定羅平  
之寇撫循有術克成安國之軍弩放水犀想射潮  
之餘烈袍加玉帶酬拓地之成勞功名旣表於當  
年勲猷猶昭於奕世屬車重泣

祖武是繩問衣錦之舊營英風宛在訪表忠之古



觀勝迹堪懷特命專官載陳隆禮靈其來格饗是  
明裡

明臣常遇春祭文

維乾隆二十二年歲次丁丑某月某朔越幾日  
皇帝遣某官致祭于明臣常遇春之靈曰惟爾奮  
興草澤懋建勲庸當遇主于和陽已抱濟時之略  
暨立功于采石聿彰克敵之奇摧吳漢之勁兵每  
衝堅而陷銳定河洛之重地常決策而運籌裂土  
分茅洵酬勞之罔愧銘鐘勒鼎爰紀績于無窮朕  
載蒞南邦式循

祖武顧瞻鍾阜見祠墓之猶存重舉明禋展馨香  
于勿替靈其來格尚克居歆

明臣于謙祭文

維乾隆二十二年歲次丁丑某月某朔越幾日  
皇帝遣某官致祭於明臣于謙之靈曰惟南邦之  
傑士爲勝國之名臣出建旌麾已見經文而緯武  
入參帷幄彌彰憂國而忘家當時事之艱危藉奇  
才爲保障陳師鞠旅從容而定敵愾之謀草檄飛  
符慷慨而著守陴之烈雖大勲暫屈於當日而定  
論終炳於千秋朕再舉省方緬懷遺躅丹心青史

忠魂猶傍夫靈潮碧瓦朱旂廟貌長留於勝地載陳牲醴爰布几筵禮有攸隆靈其用饗

徐潮祭文

維乾隆二十二年歲次丁丑某月某朔越幾日

皇帝諭祭經筵講官吏部尚書兼翰林院掌院學士徐潮之靈曰佐熙朝而交泰贊襄端藉於臣鄰頒闡澤以酬庸饗祀特崇於典禮蓋心懷篤棐夙裕嘉謨斯績炳旂常彌昭奕葉述稽令式宜薦馨香爾徐潮端謹持身寅恭盡職早登詞苑蔚成華國之才游歷京卿用展經邦之略由秋官而出秉

憲節兩河並効其旬宣典計部而擢領銓曹九列  
咸欽其恪慎於戲令聞丕著徽猷旣懋於朝班遺  
澤長留祠宇猶新於里黨用申綸綍洒掃重新爰  
布几筵牲醪是奠靈其來格歆是新恩

吏部尚書王安國祭文

宣猷効力人臣懷靖獻之忠念舊旌賢國家懋卹  
終之制逖稽典禮爰錫苾芬爾王安國稟性樸誠  
居心清正蓬山簪筆早推淵雅之才嶺嶠掄材用  
播公明之譽迨建牙而開府克宣化以承流晉爵  
秩宗矢寅清於夙夜秉鈞銓部持藻鏡於樞衡溯

其敷歷之年無忝靖共之義何期奄逝宜沛隆施  
嗚呼絮酒聿陳尚想篤棐之素長筵式奠用昭褒  
恤之文惟爾有靈尚其歆饗

原任鎮守湖廣荊州等處都統將軍宗室  
尚建寶祭文

分守巖疆端藉干城之器宣勞專閫聿資屏翰之  
材嘉偉績之克彰洵隆恩之宜沛爾尚建寶稟姿  
果毅賦性樸淳衍派天潢裕才猷于武庫備員宿  
衛効忠欵于期門爰以上將之威聲遙泣荆南之  
重任楚蜀襟喉之地允賴撫綏韜鈴竒正之方尤

精訓練作爪牙于一鎮膺寵錫于

三朝祇緣偶抱沉疴暫爾退居散地方期矍鑠遽  
患膏肓爰頒牲醴之儀用布几筵之奠嗚呼赴桓  
永逝想曩烈于飛熊靈爽猶存溯英風于喚鶴欽  
茲新命尚克歆承

台吉桑濟札普祭文

克敵致果當矢有進無退之忱國爾忘身宜全舍  
生取義之節爾桑濟札普名先一隊心抱孤忠膺  
頡利之新銜領昆彌之舊部拔戟而起方賈勇以  
前驅免胄而行終捐軀以不悔嘉貞心之可尚在

外吏而尤難用昭褒恤之儀爰致牲醪之奠靈其  
來格尚克居歆

管旗章京達西丕爾祭文

執戈以衛國資敵愾之才免胃而趨士重捐軀之  
節爾達西丕爾身居末秩心矢樸忠當小醜之逋  
逃隨大兵以掩捕懸軍深入方期奮勇以先登舍  
命不渝寧忍偷生而倖免伊貞操之克勵宜異數  
之特頒爰申奠醑之隆儀庶慰泉壚之毅魄靈如  
不昧尚克來歆

中書多永武祭文

師直爲有名士快從征之樂臨難母苟免國崇致命之臣爾多永武官備西清身依壯闕橐筆重判花之選行軍資倚馬之能乃牙璋交警方踴躍以先登而坎窞當前遂慨慷以就義嗟英風之未泯宜懋賞之特加爰奠牲醪用昭撫卹靈其來饗欽是新綸

太醫院吏目王世興祭文

疆場効命固人臣盡節之常體卹從優乃國家勸忠之典爾王世興職雖參于方技心實具夫樸忠屬絕塞之用兵爰從軍而自效青囊有術方踴躍



以前驅碧血明心遂慷慨以就義嗟介節之可尚  
豈末吏之獨殊用頒牲醴之陳以示褒嘉之意靈  
其來格尚克歆承

春帖子

乾隆二十二年十二月二十六日立春擬

春帖子八首

吹葭琯裏陽春早飛絮林中瑞雪多乍聽千門催  
響竹早從三白兆嘉禾

慈寧純嘏籌添又王會車書譯置重舊臘新春迴  
玉燭農祥晨正轉蒼龍

玉煙縹緲玉河濱金霧霏微金水津大有年占人有慶建寅月紀戊寅春

書成百福箋烘翠醞就三光酒滴紅菴藹花香浮上苑溫暾草色動東風

聖人久道化成日海內無思不服時盤進五辛憑柏配階餘四葉有莫知

紺轅黛耜行耕藉鉏砌瑤壇佇酌匏一色杏花攬柳線十分桂醴奠蘭肴

時將二紀六階平令轉三微九階晴六斗稱觴歌在鎬和笙譜曲樂由庚

南薰撫柱閑調曲西嶺開簾濕映嵐細雨一犁扶  
綠野溫風八繭簇紅蠶

西莊始存稿卷二十四